



MOCIÓN PARA RESOLVER OS DESEQUILIBRIOS RETRIBUTIVOS ENTRE OS DIFERENTES CORPOS E FORZAS DE SEGURIDADE DO ESTADO

O Grupo Municipal do Partido Popular, ao abeiro do Regulamento Orgánico Municipal, presenta, para a súa inclusión no Pleno, a seguinte MOCIÓN:

EXPOSICIÓN DE MOTIVOS


No transcurso dunha iniciativa impulsada polo Grupo Municipal na sesión plenaria do pasado mes de outubro na que se reclamaba o apoio aos Corpos e Forzas de Seguridade do Estado no marco dos acontecementos que se estaban a rexistrar na Comunidade catalá onde foron obxecto dun acoso constante para impedir que os axentes exerceran as funcións que lexítimamente teñen encomendadas, houbo unha certa coincidencia entre os grupos da Corporación acerca da existencia de importantes diferenzas salariais entre estes colectivos nos distintos territorios do Estado e a lóxica de avanzar cara a unha equiparación.

Tanto os atentados terroristas como a vulneración da legalidade que se ten producido en Cataluña axudaron a poñer aínda máis de realce entre a cidadanía a importancia dos corpos e forza de seguridade do Estado como garantes das liberdades para o sistema democrático. Iso fixo que se producira un xeral recoñecemento e admiración de toda a sociedade ao sentirse identificada co importante papel que prestan de forma especial a Policía Nacional e a Garda Civil, realizando un servizo público que se vén mantendo desde hai décadas, contribuíndo á conformación dunha sociedade libre nun marco de liberdades seguro.

Pero a pesar do excelente traballo que desenvolven, a Policía Nacional e a Garda Civil seguen a manter desde hai moitos anos unha menores percepcións salariais que outros corpos equiparables. Esa situación fixo que estes dous corpos se teñan mobilizado para tratar de rematar con esta discriminación que están sufrindo, co fin de lograr unha xusta aplicación do axioma "a igual funcións, igual salario".

Desde o Grupo Popular, ademais de recoñecer e a valorar sen ambaxes o labor dos corpos e forzas de seguridade, compartimos a necesidade de acabar con esta discriminación e facer posible que o recoñecemento popular leve aparellado un necesario recoñecemento profesional por parte da Administración do Estado, e en particular do Ministerio do Interior. Porque, ata o momento segue a manterse unha situación de desigualdade que afecta non só ao ámbito salarial, senón tamén ás condicións laborais e profesionais. Unha circunstancia que para nada está a afectar a estes profesionais para levar a cao as súas funcións de forma exemplar, na defensa da seguridade cidadá e das liberdades públicas, nas comunidades e concellos onde están a actuar.

En atención a estas consideracións, o Grupo Municipal do Partido Popular presenta para a consideración da Corporación o seguinte



ACORDO:

O Concello de Santiago de Compostela, en atención ao importante labor compartido que desempeñan os Corpos e Forzas de Seguridade do Estado para a defensa dos dereitos e liberdades da cidadanía que emanan da legalidade constitucional, actuando como garantes do Estado de Dereito e da convivencia entre a cidadanía, acorda instar ao Goberno de España a incorporar nas próximas leis de Orzamentos Xerais do Estado, a partir do próximo ano 2018, as partidas necesarias para resolver progresivamente os desequilibrios retributivos que poidan existir entre os diversos membros das Forzas e Corpos de Seguridade do Estado, e, á súa vez, dentro do marco legal orzamentario, para achegalos aos doutros corpos policiais.

Para o seu coñecemento, daráselle traslado deste acordo ao presidente e á vicepresidenta do Goberno de España, aos ministros de Xustiza e de Interior do Goberno de España, aos portavoces dos grupos parlamentarios do Congreso e do Senado, aos portavoces dos grupos parlamentarios da Cámara autonómica, e á Xunta de Goberno da FEMP.

Santiago de Compostela, 7 de novembro de 2017



Agustín Hernández
Portavoz do Grupo Municipal Popular